

新纂雲南通志

第十函
第十冊

新纂雲南通志卷一百五十三目錄

財政考四

歲入四

課稅二

釐金

關稅

協餉

新纂雲南通志卷一百五十三

財政考四

歲入四

課稅二

釐金

釐金之舉辦始於咸豐三年雷以誠治軍揚州軍事緊急餉源枯竭於仙女鎮倡辦釐捐是爲籌設釐金之嚆矢後各省遂仿照辦理滇省釐金之設置在同治十三年雲南巡撫岑毓英奏准抽收牙釐時當軍興三迤自行分界抽收藉供兵餉章程錯出款目難稽至光緒初年始由釐金總局擬定畫一征率分行各局遵照辦理全省年收數約得銀叁拾陸柒萬兩

滇省釐金約可分爲十一類一曰百貨釐二曰紅糖釐三曰川菸釐四曰土菸釐五曰土酒釐六曰綢緞釐七曰鹿茸釐八曰麝香釐九曰大錫釐十曰省貨釐十一曰各項雜收而各項雜收又可分爲五項一曰隨釐加色二曰開支扣獲平餘三曰核減各局開支四曰包收省城牲畜油酒釐五曰罰款茲依次分述於後

百貨釐

滇省釐金在創始征收時係以土藥爲大宗百貨其少數

也光緒九年布政使唐炯另訂新則將原應抽釐各貨刪除十分之三遂致收數銳減十年及十一年經局協議將民間日用所需各物規復三十餘種從輕定章抽收始有起色二十一年及二十五二十七等年疊奉部飭加征茶糖菸酒各釐數鉅期迫議各釐未能悉歸一律三十年因須籌解練兵經費議加土藥稅項責成各局隨釐兼

收收數較旺三十二年復將藥材棉鐵緞帽等貨釐章重爲審訂除茶糖菸酒正加各釐另冊報解外所有各貨大都不外值百抽五並經總局嚴定比較隨時派員密查據解款之短長核委員之功過宣統元年實行禁煙停收土藥釐稅以致比較多不如額揆厥情形由於土藥百貨互爲輸換以無土藥輸出遂少百貨輸入滇省素無大宗出產興辦實業又非旦夕所能收效此百貨釐金收數銳減之原因也計光緒三十四年分收百貨釐銀貳拾貳萬捌仟玖百伍拾餘兩宣統元年僅收銀壹拾玖萬肆仟伍百餘兩平均年收銀貳拾萬兩左右爲百貨釐歲入的款

紅糖釐 滇省糖釐惟東川府屬巧家廳之蒙姑釐局彌勒縣屬之竹園及臨安府屬之畹戛縣等處爲出產之地率皆細民負販日覓

蠅頭又必販運出境始能抽釐是以年收糖釐爲數無幾按舊章大碗紅沙糖小碗耳糖每百觔抽正釐銀壹錢據各局征解年僅叁仟數百兩光緒二十年籌餉案內由局會司核議詳准加征糖釐由二十一年正月初一日起照原收數加二成抽收並照通案以實收之數劃六成開報彙同所加之菸酒茶釐分款解司存助軍餉計每百觔加收二成銀貳分年約收伍陸百兩二十七年籌攤賠款於加收二成外再加二成共加爲每百觔收正釐壹錢加釐肆分平均核計年約收正釐銀叁仟叁百餘兩加釐銀壹仟肆百餘兩

川菸釐 川葉菸產於四川什邡金堂等處質厚香烈價亦相宜滇人多嗜之爲消耗品之一大宗向於鹽井渡釐局抽收釐金照章每百觔抽釐金銀壹錢光緒二十年由該局詳准自八月初一日起每

百觔加抽釐銀叁錢旋准部咨加抽菸酒稅釐始於二十一年正月
照詳案分別加抽按年劃半解司存助軍餉二十五年復奉部咨以
帑項奇絀用度不敷飭於菸酒釐金應照從前加收之數再加征一
倍遂將川菸於現抽釐金肆錢之上加收肆錢以壹錢爲正釐柴錢
爲加收每百觔共抽銀捌錢於二十六年二月通飭遵辦年收正加
釐金壹仟數百餘兩二十七年賠款之案未議再加三十二年重訂
通省釐章四川葉菸改爲每百觔抽正加釐金各伍錢四川絲菸每
百觔抽正釐銀六錢加釐亦如之歷年照此抽收平均核計年約收
正加釐銀叁仟餘兩

土菸釐 土產菸葉質味甚薄價亦甚賤舊章每百觔抽銀捌分然
非成挑成駄販運出境不能抽收且因川菸來源較廣土菸愈形滯

銷故此項釐金終歲絕少報解向時行銷廣東水煙按百觔抽釐壹兩稅亦如之自蒙自成立海關後關章每百觔僅收子口半稅貳錢貳分伍釐商人惟利是趨概由關入口取票行銷內地釐章雖有水煙金蘭煙名目幾同虛設土菸更大受影響嗣因疊次加重菸酒稅釐本地葉菸定爲每百觔抽正釐銀貳錢加釐銀貳錢平均核計年約收正加釐銀壹仟貳叁百兩

土酒釐

滇省多以雜糧釀酒其味淡劣每遇災歉封禁蒸熬故舊

行釐章雖有清酒百觔抽釐金銀陸分之條而報解無多每年全省征解酒釐不過貳百餘金其外來各酒舊章載有四川仿紹加大每罇抽銀壹錢川陝大麴酒每百觔抽銀叁錢然道遠運艱從未報納釐金嗣於加重菸酒釐稅案內定爲清酒每百觔原收正釐陸分加

抽釐銀陸分四川仿紹加大每罈原收正釐壹錢加抽銀伍分川陝大麵酒每百觔原收正釐叁錢加抽銀貳錢照案劃半解司存助軍餉後又將土酒於現抽壹錢貳分外加抽銀壹錢貳分二十七年賠款之案以土酒一項每百觔值銀叁兩之譜現在抽正加釐銀貳錢肆分將及值百抽十向來各局只以正釐准入比較而正數輕於加收遂至各局多作零星包收附省各局猶有報解遠如思普威遠楚雄三姚等局有終年未據報收酒釐者若再加重徒資中飽因議勿庸再加三十二年重修通省釐章定爲土酒每百觔正加釐金各抽貳錢平均核計年約收正釐銀壹百數拾兩加釐亦如之

綢緞釐

滇省行銷綢緞各物向以蘇杭四川輸入之貨爲多釐章

載線縐湖縐寧綢仿綢裏綢花綾紗羅緞子每觔約值價銀伍陸兩

陸柒兩不等只抽釐銀貳錢未至值百抽五之數光緒二十七年以
滇省應攤賠款叁拾萬兩合計裁減各款所短尙鉅經司局會議於
各項大宗貨物加釐外擬再酌加綢緞等類釐金因綢緞非平民所
需即加重釐金尙於民生無礙復經查明舊章載綢緞每觔抽銀肆
錢因即酌定於現章抽釐貳錢外加抽釐銀壹錢計各項綢緞每觔
實收銀叁錢自二十八年二月十五日起一律照案加抽另冊報解
專款彙司湊解賠款不入比較不支局用歷經遵辦在案三十二年
以歷次議加各釐未能一律重修通省釐章將綢緞一項規復舊章
就中分別爲蘇杭綢緞每觔抽釐金銀肆錢四川綢緞每觔抽釐金
銀叁錢並於正釐外一律抽加釐銀貳錢此後均照案抽收以歷年
收數平均核計年約收正釐銀壹萬肆仟數百兩加釐銀陸仟數百

兩

鹿茸釐 鹿茸爲上品藥材每架值銀數拾兩貳叁百兩不等最低價格亦在貳拾兩左右非富人不能購買釐章載南茸每架抽正釐銀壹兩貳錢麋茸每架抽正釐銀陸錢抽數未免太輕光緒二十七年賠款案內經司局核議南茸每架加抽銀捌錢合正釐共抽銀貳兩麋茸每架加抽銀肆錢合正釐共抽銀壹兩以後均照案遵辦平均核計年約收正釐銀叁肆拾兩加釐銀貳叁拾兩

麝香釐 麝香亦上品藥材滇省邊界多有之每觔價銀約百數拾兩釐章載麝香每觔抽正釐銀肆兩因其體質輕便易於隱匿又恆由官場包攬夾帶大商巨賈多不報納釐金光緒二十七年賠款案內經司局核議麝香每觔加抽釐銀貳兩合正釐共抽銀陸兩自二

十八年二月十五日起一律照章加抽另冊報解專款彙司湊解賠款不入比較不支局用並嚴定漏釐沒收貨物半數暨撤懲賣放釐卡員役給獎查出漏釐之員役書丁各章程以示勸懲嗣後即照辦在案以歷年收數平均核計年約收正釐銀伍百數拾兩加釐銀叁百數拾兩

大錫釐 箇舊廠所產大錫係滇中大宗貨物商人運赴各口銷售獲利甚鉅按原釐章每票重貳仟貳百貳拾觔計貳拾伍塊爲一張共抽釐金銀壹拾貳兩向以八八折爲庫平足色批解核計每塊重捌拾捌兩收釐銀肆錢捌分以每百觔計算只合抽釐銀伍錢肆分伍毫肆絲有奇而每錫百觔高下牽算約值價銀貳拾伍陸兩左右以每張貳仟貳百貳拾觔合算應值價伍陸百兩現抽釐銀拾貳兩

只合值百抽二之譜光緒二十七年賠款案內由司局核議以舊案抽釐太輕擬加重抽收用資集湊嗣經查明大錫一項尙有就廠抽收正課票費以及臨安八屬膏火數亦不貲因酌中定爲每張於現抽廠色銀拾貳兩外加收銀肆兩計每錫一張共抽正加釐銀拾陸兩每塊合抽銀陸錢肆分仍准以八八折爲足色庫平批解不准坐支五分局用由箇舊同知隨同正釐按季全數批解於二十八年五月初一日起照辦在案以歷年收數平均核計年約收正釐銀貳萬數仟兩加釐銀柒仟數百兩

省貨釐 雲南省城各行舖戶如絲線行所造之絲線紗帕纓帽行所製之大小帽各靴鞋舖所做之靴鞋以及衣舖之粗細故衣等省貨向因所用之絲緞等貨已於入關時上過釐金各行改作需時又

將原貨分零故不拘票限不問原票准由各鋪戶自用行單換取出
關照票即可運銷外屬光緒二十七年賠款案內雖裁減軍政各費
及續加茶糖菸酒等釐每年仍不敷尙鉅經司局協議以各省貨銷
數匪細雖所作線帽之絲緞等貨完過釐金而絲已成線緞已成帽
貨名既前後迴別即按切線帽各名目抽收釐金亦不爲過但體念
各鋪戶本小利微負擔不宜過重酌中定爲凡用行單換取出關照
票之線帽等項省貨於出關時各照定章從減抽收三成釐金以之
添湊賠款商人販運省貨出省須到六城局照減定章程納釐取票
仍至釐金總局出關票所換取出關照票俾經過外局照常查驗六
城局所填之票即由出關票所按月彙收轉交核對所與六城局冊
報核對以期涓滴歸公無所隱漏於二十八年七月二十日照章起

辦計省大帽每百頂抽銀陸錢省瓜皮緞小帽每百頂抽銀壹錢伍分省洋緞小帽每百頂抽銀壹錢省絲棉每觔抽銀陸分省紗帕每連抽銀陸分省緞靴每百雙抽銀玖錢省鑲素各鞋每百雙抽銀伍錢省粗細故衣每百觔抽銀玖錢省細新成衣每百觔抽銀貳兩以上九項就歷年收數平均核計年約收加釐銀陸柒百兩

各項雜收五種區分如下 一隨釐加色 滇省抽釐因平碼既大

小不一銀色復高低不齊光緒十一年一律改用庫平砵碼收解足

色課銀久經飭遵辦理在案嗣於二十四年整頓土藥釐金案內通飭各局嗣後凡商人上納釐金統按匯號雙印公估紋銀明加一五
色收解其所收銀兩積有成數另款解司備用又自二十六年起照
案釐金項下每年應行節省開支銀玖仟兩彙候部撥而各局每年

照省案扣解節省開支與應解玖仟兩之數不敷甚鉅以每年釐金支款應行解部減平銀兩三六平餘抵解亦屬不敷經核明稟請在於貨釐加色項下提款彌補又於二十七年賠款案內議裁二十五年分新加文武各缺津貼將各正佐津貼改照二十年分詳定省案支給應支銀數與報部章程每年不敷銀壹仟捌百玖拾陸兩當核計各井鹽釐及大錫釐金每年約收銀拾伍萬兩之譜擬亦准以雙印公估紋銀仿照貨釐每兩明加壹分伍釐補色以之挹注正佐不敷報部津貼劃作外銷造報又二十八年行使龍圓所有搭解司庫龍圓奉飭應將各色隨同解司均各照辦在案截至三十四年止歷年所收隨釐加色平均核計年約收銀捌玖仟兩自宣統元年停收土藥釐後收數銳減年僅收銀肆仟餘兩之譜 二開支扣獲平餘

滇省釐金報部支款向來均按庫平支放並無核扣減平之案光緒二十三年奉准部咨御史宋伯魯奏請添扣各項減平以裕餉源等因當經由局詳准將支發各府廳州縣佐貳雜職津貼文武月課獎賞貨釐各局一成局用鹽釐五分開支等項向由釐金項下報部支用正款均自二十三年十月初一日起每兩核扣肆分統按湘平發給嗣奉部駁飭每兩應扣減平銀陸分復經局查核釐金項下報部支用正款往年約共銀伍萬叁仟數百兩按每兩核扣肆分年應解部減平銀貳仟壹貳百兩統由本省之實支項下每兩所扣叁分陸釐平餘數內提解合向由平餘應支故員幫項等款通盤籌計出入每年尚不敷銀叁百餘兩今報部正款應遵部飭每兩扣減平銀陸分則釐金項下報部支用正款每年應加解銀壹仟餘兩擬由釐